



La ruschnera cun suga sur il Lag Grond ei vegni-
da duvrada fetg stedi.



Annette e Linus Capaul s’engaschan dapi bunamein l’entschatta, pia dapi igl onn 2000, per la fiasta
d’affons a Laax.

FOTOS MARTIN GABRIEL



Las picturas-artistas da damaun ein stadas sonda ella tenda da fiasta.



Ina vacca ha gidau d’endriescher danunder ch’il latg vegn.

Treimelli ein stai alla Fiasta d’affons

Laax ha beneventau la davosa fin d’jamna ver 3000 affons alla Fiasta d’affons tradiziunala sper il Lag Grond. Per la 22avla gada dapi igl onn 2000 ha la cuminonza d’interess che organischescha la fiasta d’affons purschiu varga 40 attracziuns cun giugs, movi-
ment, concurrenzas e pusseivladads da zambergiar.

MARTIN GABRIEL/FMR

Mintga stad s’auda il contuorn dil Lag Grond a Laax duront dus dis als affons. La davosa sonda e dumengia eisi puspei stau aschi lunsch. Varga 40 differentas attracziuns ha l’uniun Fiasta d’affons Laax purschiu. Mellis d’affons da dus entochen tredisch onns cun lur famiglias han gudiu l’occurrenza Els han saviu sesmincar, pendular vid la suga sur il Lag Grond vi ni era cun zambergiar e semesirar per exempel en ina concurrenza da reiver sin harass ni d’ir cun canu.

Linus Capaul ch’ei scrinari a Laax ei in dils veterans dalla Fiasta d’affons a Laax. El ha gi-
dau d’organisar la fiasta naven dall’entschatta avon 24 onns.

Cumin d’affons ei in peglias

«Jeu e mia dunna Annette, ch’ei era activa da-
pi l’entschatta alla Fiasta d’affons, vuessan bu-
ca sefittar cun arbagias che s’audan buc a nus»,
di Linus Capaul. «Iniziau la Fiasta d’affons da
Laax ha oriundamein la vischnaunca da Laax.»
Il president communal dad oz *Franz Gschwend*
hagi giu l’idea da lezzas uras d’instradar ina fia-
sta da stad pils affons e d’engaschar persunas
disoccupadas cun construir, drizzar en e puspei
rumir ils singuls posts. «Nus havevan sezs af-
fons pigns da lezzas uras ed havein perquei su-
steniu l’idea e segidau cun l’organisaziun.»

Pli tard hagi il club da ballapei da Laax sur-
priu l’organisaziun dalla fiasta ed engrondiu
quella, seregorda Linus Capaul. «Pli tard sun
jeu lu era staus part dil comite d’organisaziun
sco cassier. Entgins onns pli tard han ins lu
fundau ina cuminonza d’interess ‘Fiasta d’af-
fons Laax’ che organischescha ‘il cumin d’affons’
entochen il di dad oz.»

«Magari eis ei legher d’observar co ils babs vegnan pli tschufs dil zambergiar ch’ils affons.»

Linus Capaul,
dapi 24 onns en acziun
per la Fiasta d’affons a Laax

3000 affons spetgan mintg’onn

Linus Capaul raquenta cun plascher dalla Fia-
sta d’affons ch’ei carschida considerablamein.
«Naven dil mument che nus havein fundau la
cuminonza d’interess per la fiasta eisi iu ensi
naven da 1000 sin oz ferm 3000 affons che
prendan part.» El di che la cuminonza d’inte-
ress hagi buca la finamira da far gudogns. «Ils
tschun francs che nus incassein sco entrada da
mintg’affon duvrein nus per curclar ils cuosts
da material. Sper las entradas survegnin nus
naturalmein contribuziuns da sponsurs privats
e dalla vischnaunca.»

Dalla ruschnera cun suga

Sin viadi atras il parcours da fiasta seferma Li-
nus Capaul sper in post nua ch’ils affons san
sprizzar cun in uder encounter diversas stgellas
da vaccas ed empruar da crear ina melodia.
«Quella purschida ei aunc buc aschi veglia», di
il scrinari. Ei vegn mintg’onn vitier enzatgei
niev. Auters posts svaneschan. E quei che vegn
frequentau pauc, svanescha era. Fetg savens ha-

gi in ni l’autra dils organisaturs duront igl onn
in giug ni ina idea da zambergiar, e lu vegni
quella idea adattada allas relaziuns dalla fiasta
d’affons epi integrada, raquenta Linus Capaul.

Paucs meters pli lunsch ei partenza dalla ru-
schnera cun suga che parta si ad ault e che por-
ta ils affons cun tempo sur il Lag Grond vi. Te-
nor Linus Capaul ei quei ina dallas pli veglias
purschidas che vegn organisada dils pumpiers
da Laax. «Quei ei adina fetg tschercau. Da pen-
dular vid la suga sur il lag vi fan surtut ils af-
fons pli gronds bugen.» Il scrinari e gidonter
surri e di: «Ei dat era caussas ch’ils carschi em-
provan avon ch’ils affons. Magari eis ei legher
d’observar co ils babs vegnan pli tschufs dil
zambergiar ch’ils affons.»

150 gidontras e gidonters

150 gidontras e gidonters voluntaris ein en ac-
ziun la sonda e la dumengia dalla Fiasta d’af-
fons a Laax. Tuts prestan lavur gratuita. Sco en-
graziamet dat ei ina «party da gidonters» cun
tscheina e divertiment.

Ina sfida ei apparentamein da survegnir
novs gidonters. Ils organisaturs actuals fe-
tschien grondas stentas era cun far reclama da
bucca a bocca ni via medias socialas, di Linus
Capaul. Ils resuns seigien denton buc adina
numerus. E tuttina: Enzoaco mondi ei adina vi-
navon. «Igl ei in plascher da veser co ei func-
ziunescha cun nossa fiasta. Jeu vegnel en min-
tga cass a s’engaschar vinavon sco gidonter. La
responsabladad el comite d’organisaziun haiel
jeu denton surdau a mia dunna che tgira las fi-
nanzas dalla fiasta.» Ed il proxim cumin d’af-
fons sper il Lag Grond ei era gia planisau e ter-
minaus. Linus Capaul: «Il proxim cumin d’af-
fons sper il Lag Grond ha liug ils 18 ed ils 19
da fenadur 2026.»

GLION

In’oasa da stad el marcau

Dapi igl avrel 2025 datti in local d’art e cultura el marcau
vegl da Glion. Gievgia vargada, ils 17 da fenadur 2025,
ha giu liug el local da cultura ed art Zezzaneera la vernis-
sascha d’ina exposiziun da cartas postalas creadas da 38
artistas ed artists dalla regiun e d’ordeifer la Surselva.

MARTIN GABRIEL/FMR

«Beinvegni all’oasa da stad a Glion.» – Aschia ha *Bea König*, la
gestiunaria dalla galleria Zezzaneera che sesanfla gest all’entrada
dil marcau vegl da Glion, salidau las ver 30 dunnas ed umens che
han dau suatientscha all’invitaziun dil local d’art e cultura ch’ei
vegnius aviarts avon treis meins. «Gagl, legher ed artistic daven-
ta la stad ella Zezzaneera», ha la menadra dil local detg ed ha ani-
mau il publicum da prender peda da mirar las 160 fotografias
dallas 38 artistas ed artists ch’ein per part era stai presents alla
vernissascha dalla davosa gievgia sera.

L’entschatta dalla carta postala

El center dall’exposiziun stattan cartas postalas ch’ein vegnidas
creadas d’artistas ed artists dalla regiun, dalla Svizra mo era digl
exteriur. Presentadas vid las preits dil local vegnan fotografias,
graficas, dessegns e cartas postalas ch’ins ha duvrau per illustra-
ziuns. Bea König che ha supriu la primavera la gestiun artistica
dalla galleria ei s’occupada en siu plaid d’avertura dalla historia
dalla carta postala ch’ei vegnida introducida en Svizra igl onn
1870. Egl exteriur avertedi ins dil secret da posta, ha la gestiuna-
ria detg. «La posta austriaca-ungaresa ha communicau da lezzas
uras ufficalmein ch’ella suprendi negina responsabladad pil cun-
tegn dils texts», ha Bea König detg. «Mo cul turissem ei la carta
postala daventada in product da vendita impurtont pils hotels e
loghens da bogn e da vacanzas.»



La menadra dalla galleria Zezzaneera Bea König ha beneventau il
publicum cun metter el context l’historia dallas cartas postalas cun
las cartas postalas artisticas.

FOTO MARTIN GABRIEL

Cartas postalas ed auter

Bea König ha accentuau che la finamira dalla galleria Zezzane-
era a Glion seigi buca da far reclama pils sujets dallas cartas posta-
las turisticas dils decennis vargai, mobein da mussar con multi-
fara che la lavur artistica cun cartas postalas ei. «Ils 160 motifs
ein cartas singulas ni era serias che san era vegnir cumpradas tier
nus per dus entochen tschun francs per toc». Exponi sin in in-
drez da pender si resti ein plinavon era schigientamauns creai da
designeras enconuschentas sco *Mara Tschudi* ni *Lea Krebs*. Ed
all’entrada offerescha Zezzaneera «glatschs dil bein puril da
Breil» e da «Sursleva Gelato da Castrisch.» Ell’exposiziun «Bein-
vegni ell’oasa da stad» ein denter auter exponidas lavurs da Mirko
Baselgia, Ester Vonplon, Bridget Wilkin e da biars auters.

La galleria Zezzanera ei aviarta mintgamai la gievgia dallas 14.00–20.00 ed
il venderdis e la sonda dallas 14.00–18.00. L’exposiziun da fotografias cuoz-
za entochen ils 29 da settember 2025.

reclama

